

摘藻堂四庫全書薈要

史部

欽定四庫全書薈要卷四千九百十四

史部

舊唐書卷二

後晉司空同中書門下平章事劉 昫撰

本紀第二

太宗上

太宗文武大聖大廣孝皇帝諱世民高祖第二子也母  
曰太穆順聖皇后竇氏隋開皇十八年十二月戊午生  
於武功之別館時有二龍戲於館門之外三日而去高

祖之臨岐州太宗時年四歲有書生自言善相謁高祖  
曰公貴人也且有貴子見太宗曰龍鳳之姿天日之表  
年將二十必能濟世安民矣高祖懼其言泄將殺之忽  
失所在因採濟世安民之義以為名焉太宗幼聰睿玄  
鑒深遠臨機果斷不拘小節時人莫能測也大業末煬  
帝於鴈門為突厥所圍太宗應募救援隸屯衛將軍雲  
定興營將行謂定興曰必賫旗鼓以設疑兵且始畢可  
汗舉國之師敢圍天子必以國家倉卒無援我張軍容

令數十里幡旗相續夜則鉦鼓相應虜必謂救兵雲集望塵而遁矣不然彼衆我寡悉軍來戰必不能支矣定興從焉師次崞縣突厥候騎馳告始畢曰王師大至由是解圍而遁及高祖之守太原太宗時年十八有高陽賊帥魏刀兒自號歷山飛來攻太原高祖擊之深入賊陣太宗以輕騎突圍而進射之所向皆披靡拔高祖於萬衆之中適會步兵至高祖與太宗又奮擊大破之時隋祚已終太宗潛圖義舉每折節下士推財養客羣盜

大俠莫不願効死力及義兵起乃率兵略徇西河尅之  
拜右領大都督右三軍皆隸焉封燉煌郡公大軍西上  
賈胡堡隋將宋老生率精兵二萬屯霍邑以拒義師會  
久雨糧盡高祖與裴寂議且還太原以圖後舉太宗曰  
本興大義以救蒼生當須先入咸陽號令天下遇小敵  
即班師將恐從義之徒一朝解體還守太原一城之地  
此為賊耳何以自全高祖不納促令引發太宗遂號泣  
於外聲聞帳中高祖召問其故對曰今兵以義動進戰

則必尅退還則必散衆散於前敵乘於後死亡須臾而  
至是以悲耳高祖乃悟而止八月己卯雨霽高祖引師  
趣霍邑太宗恐老生不出戰乃將數騎先詣其城下舉  
鞭指揮若將圍城者以激怒之老生果怒開門出兵背  
城而陣高祖與建成合陣於城東太宗及柴紹陣於城  
南老生麾兵疾進先薄高祖而建成墜馬老生乘之高  
祖與建成軍咸却太宗自南原率二騎馳下峻坂衝斷  
其軍引兵奮擊賊衆大敗各捨仗而走懸門發老生引

繩欲上遂斬之平霍邑至河東關中豪傑爭走赴義太宗請進師入關取永豐倉以賑窮乏收羣盜以圖京師高祖稱善太宗以前軍濟河先定渭北三輔吏民及諸豪猾詣軍門請自効者日以千計扶老攜幼滿於麾下收納英俊以備僚列遠近聞者咸自託焉師次於涇陽勝兵九萬破胡賊劉鷄子并其衆留殷開山劉弘基屯長安故城太宗自趣司竹賊帥李仲文何潘仁向善志等皆來會頓于阿城獲兵十三萬長安父老賣牛酒詣

旌門者不可勝紀勞而遣之一無所受軍令嚴肅秋毫無所犯尋與大軍平京城高祖輔政受唐國內史改封秦國公會薛舉以勁卒十萬來逼渭濱太宗親擊之大破其衆追斬萬餘級略地至于隴坻義寧元年十二月復為右元帥總兵十萬徇東都及將旋謂左右曰賊見吾還必相追躡設三伏以待之俄而隋將段達率萬餘人自後而至度三王陵發伏擊之段達大敗追奔至于城下因於宜陽新安置熊穀二州戍之而還徙封趙國



公高祖受禪拜尚書令右武侯大將軍進封秦王加授  
雍州牧武德元年七月薛舉寇涇州太宗率衆討之不  
利而旋九月薛舉死其子仁果嗣立太宗又為元帥以  
擊仁果相持於折城城深溝高壘者六十餘日賊衆十  
餘萬兵鋒甚銳數來挑戰太宗按甲以挫之賊糧盡其  
將牟君才梁胡郎來降太宗謂諸將軍曰彼氣衰矣吾  
當取之遣將軍龐玉先陣於淺水原南以誘之賊將宗  
羅睺併軍來拒玉軍幾敗既而太宗親御大軍奄自原

北出其不意羅睺望見復迴師相拒太宗將驍騎數十  
入賊陣於是王師表裏齊奮羅睺大潰斬首數千級投  
澗谷而死者不可勝計太宗率左右二十餘騎追奔直  
趣折墪以乘之仁果大懼嬰城自守將夕大軍繼至四  
面合圍詰朝仁果請降俘其精兵萬餘人男女五萬口  
既而諸將奉賀因問曰始大王野戰破賊其主尚保堅  
城王無攻具輕騎騰逐不待步兵徑薄城下咸疑不尅  
而竟下之何也太宗曰此以權道迫之使其計不暇發

以故尅也羅睺恃往年之勝兼復養銳日久見吾不出  
意在相輕今喜吾出悉兵來戰雖擊破之擒殺蓋少若  
不急躡還走投城仁杲收而撫之則便未可得矣且其  
兵衆皆隴西人一敗披退不及回顧散歸隴外則折塹  
自虛我軍隨而迫之所以懼而降也此可謂成算諸君  
盡不見耶諸將曰此非凡人所能及也獲賊兵精騎甚  
衆還令仁杲兄弟及賊帥宗羅睺翟長孫等領之太宗  
與之遊獵馳射無所間然賊徒荷恩懾氣咸願効死時

李密初附高祖令密馳傳迎太宗於幽州密見太宗天  
姿神武軍威嚴肅驚悚歎服私謂殷開山曰真英主也  
不如此何以定禍亂乎凱旋獻捷於太廟拜太尉陝東  
道行臺尚書令鎮長春宮關東兵馬並受節度尋加左  
武侯大將軍涼州總管宋金剛之陷滑州也兵鋒甚銳  
高祖以王行本尚據蒲州呂崇茂反於夏縣晉澮二州  
相繼陷沒關中震駭乃手勅曰賊勢如此難與爭鋒宜  
棄河東之地謹守關西而已太宗上表曰太原王業所

基國之根本河東殷實京邑所資若舉而棄之臣竊憤恨願假精兵三萬必能平殄武周克復汾晉高祖於是悉發關中兵以益之又幸長春宮親送太宗二年十一月太宗率衆趣龍門關履冰而渡之進屯柏壁與賊將宋金剛相持尋而永安王孝基敗於夏縣于筠獨孤懷恩唐儉並為賊將尋相尉遲敬德所執將還澮州太宗遣殷開山秦叔寶邀之於美良川大破之相等僅以身免悉虜其衆復歸柏壁於是將咸請戰太宗曰金剛懸

軍千里深入吾地精兵驍將皆在於此武周據太原專倚金剛以為捍士卒雖衆內實空虛意在速戰我堅營蓄銳以挫其鋒糧盡計窮自當遁走三年二月金剛竟以衆餒而遁太宗追之至介州金剛列陣南北七里以拒官軍太宗遣總管李世勣程巖金秦叔寶當其北翟長孫秦武通當其南諸軍戰小却為賊所乘太宗率精騎擊之衝其陣後賊衆大敗追奔數十里敬德相率衆八千來降還令敬德督之與軍營相參屈突通懼其為

變驟以為請太宗曰昔蕭王推赤心置人腹中並能畢  
命今委任敬德又何疑也於是劉武周奔於突厥并汾  
悉復舊地詔就軍加拜益州道行臺尚書令七月總率  
諸軍攻王世充於洛邑師次穀州世充率精兵三萬陣  
於慈澗太宗以輕騎挑之時衆寡不敵陷於重圍左右  
咸懼太宗命左右先歸獨留後殿世充驍將單雄信數  
百騎夾道來逼交搶競進太宗幾為所敗太宗左右射  
之無不應弦而倒獲其大將燕頤世充乃拔慈澗之鎮

歸於東都太宗遣行軍總管史萬寶自宜陽南據龍門  
劉德威自太行東圍河內王君廓自洛口斷賊糧道又  
遣黃君漢夜從孝水河中下舟師襲迴洛城尅之黃河  
已南莫不響應城堡相次來降大軍進屯邙山九月太  
宗以五百騎先觀戰地卒與世充萬餘人相遇會戰復  
破之斬首三千餘級獲大將陳智略世充僅以身免其  
所署筠州總管楊慶遣使請降遣李世勣率師出轅轅  
道安撫其衆榮汴洧豫九州相繼來降世充遂求救於



竇建德四年二月又進屯青城宮營壘未立世充衆二萬自方諸門臨穀水而陣太宗以精騎陣於北邨山令屈突通率步卒五千渡水以擊之因誡通曰待兵交即放煙吾當率騎軍南下兵纔接太宗以騎衝之挺身先進與通表裏相應賊衆殊死戰散而復合者數焉自辰及午賊衆始退縱兵乘之俘斬八千人於是進營城下世充不敢復出但嬰城自守以待建德之援太宗遣諸軍掘塹匝布長圍以守之吳王杜伏威遣其將陳正通

徐召宗率精兵二千來會於軍所偽鄭州司馬沈悅以  
武牢降將軍王君廓應之擒其偽荆王王行本會竇建  
德以兵十餘萬來援世充至于酸棗蕭瑀屈突通封德  
彝皆以腹背受敵恐非萬全請退師穀州以觀之太宗  
曰世充糧盡內外離心我當不勞攻擊坐收其敗建德  
新破孟海公將驕卒情吾當進據武牢扼其襟要賊若  
冒險與我爭鋒破之必矣如其不戰旬日間世充當自  
潰若不速進賊入武牢諸城新附必不能守二賊併力

將若之何通又請解圍就險以候其變太宗不許於是  
留通輔齊王元吉以圍世充親率步騎三千五百人趣  
武牢建德自滎陽西上築壘於板渚太宗屯武牢相持  
二十餘日謀者曰建德伺官軍芻盡候牧馬於河北因  
將襲武牢太宗知其謀遂牧馬河北以誘之詰朝建德  
果悉衆而至陳兵汜水世充將郭士衡陣於其南綿亘  
數里鼓譟諸將大懼太宗將數騎昇高丘以望之謂諸  
將曰賊起山東未見大敵今度險而囂是無政令逼城

而陣有輕我心我按兵不出彼迺氣衰陣久卒饑必將  
自退追而擊之無往不尅吾與公等約必以午時後破  
之建德列陣自辰至午兵士饑倦皆坐列又爭飲水遂  
巡歛退太宗曰可擊矣親率輕騎追而誘之衆繼至建  
德迴師而陣未及整列太宗先登擊之所向皆靡俄而  
衆軍合戰囂塵四起太宗率史大奈程巖金秦叔寶宇  
文歆等揮幡而入直突出其陣後張我旗幟賊顧見之  
大潰追奔三十里斬首三千餘級虜其衆五萬生擒建

德於陣太宗數之曰我以干戈問罪本在王世充得失存亡不預汝事何故越境犯我兵鋒建德股慄而言曰今若不來恐勞遠取高祖聞而大悅手詔曰隋氏分崩崤函隔絕兩雄合勢一朝清蕩兵旣尅捷更無死傷無愧為臣不憂其父並汝功也乃將建德至東都城下世充懼率其官屬二千餘人詣軍門請降山東悉平太宗入據宮城令蕭瑀竇軌等封守府庫一無所取令記室房玄齡收隋圖籍於是誅其同惡段達等五十餘人枉

被囚禁者悉釋之非罪誅戮者祭而誄之大饗將士班  
賜有差高祖令尚書左僕射裴寂勞於軍中六月凱旋  
太宗親披黃金甲陳鐵馬一萬騎甲士三萬人前後部  
鼓吹俘二僞主及隋氏器物輦輅獻于太廟高祖大悅  
行飲至禮以享焉高祖以自古舊官不稱殊功乃別表  
徽號用旌勲德十月加號天策上將陝東道大行臺位  
在王公上增邑二萬戶通前三萬戶賜金輅一乘袞冕  
之服玉璧一雙黃金六千斤前後部鼓吹及九部之樂

班劍四十人于時海內漸平太宗乃銳意經籍開文學館以待四方之士行臺司勳郎中杜如晦等十有八人為學士每更置閣下降以溫顏與之討論經義或夜分而罷未幾竇建德舊將劉黑闥舉兵反據洺州十二月太宗總戎東討五年正月進軍肥鄉分兵絕其糧道相持兩月黑闥窘急求戰率步騎二萬南渡洺水晨壓官軍太宗親率精騎擊其馬軍破之乘勝蹂其步卒賊大潰斬首萬餘級先是太宗遣堰洺水上流使淺令黑闥

得渡及戰乃令決堰水大至深丈餘賊徒既敗赴水者  
皆溺死焉黑闥與二百餘騎北走突厥悉虜其衆河北  
平時徐圓朗阻兵徐充太宗廻師討平之於是河濟江  
淮諸郡邑皆平十月加左右十二衛大將軍七年秋突  
厥頡利二可汗自原州入寇侵擾關中有說高祖云祇  
為府藏子女在京師故突厥來若燒却長安而不都則  
胡寇自止高祖乃遣中書侍郎宇文士及行山南可居  
之地即欲移都蕭瑀等皆以為非然終不敢犯顏正諫



太宗獨曰霍去病漢廷之將帥耳猶且志滅匈奴臣忝  
備維藩尚使邊塵不息遂令陛下議欲遷都此臣之責  
也幸乞聽臣一申微効取彼頡利若一兩年間不係其  
頸徐建移都之策臣當不敢復言高祖怒仍遣太宗將  
三十餘騎行剡還日固奏必不可移都高祖遂止八年  
加中書令九年皇太子建成薨王元吉謀害太宗六月  
四日太宗率長孫無忌尉遲敬德房玄齡杜如晦宇文  
士及高士廉侯君集程知節秦叔寶段志玄屈突通張

士貴等於玄武門誅之甲子立為皇太子庶政皆斷決  
太宗乃縱禁苑所養鷹犬并停諸方所進珍異政尚簡  
肅天下大悅又令百官各上封事備陳安人理國之要  
己巳令曰依禮二名不偏諱近代以來兩字兼避廢闕  
己多率意而行有違經典其官號人名公私文籍有世  
民兩字不連續者並不須諱罷幽州大都督府辛未廢  
陝東道大行臺置洛州都督府廢益州道行臺置益州  
大都督府壬午幽州大都督廬江王瑗謀逆廢為庶人

乙酉罷天策府七月壬辰太子左庶子高士廉為侍中  
右庶子房玄齡為中書令尚書右僕射蕭瑀為尚書左  
僕射吏部尚書楊恭仁為雍州牧太子左庶子長孫無  
忌為吏部尚書右庶子杜如晦為兵部尚書太子詹事  
宇文士及為中書令封德彝為尚書右僕射八月癸亥  
高祖傳位於皇太子太宗即位於東宮顯德殿遣司空  
魏國公裴寂柴告于南郊大赦天下武德元年以來責  
情流配者並放還文武官五品已上先無爵者賜爵一

級六品已下加勲一轉天下給復一年癸酉放掖庭宮女三千餘人甲戌突厥頡利突利寇涇州乙亥突厥進寇武功京師戒嚴丙子立妃長孫氏為皇后己卯突厥寇高陵辛巳行軍總管尉遲敬德與突厥戰於涇陽大破之斬首千餘級癸未突厥頡利至于渭水便橋之北遣其酋帥執失思力入朝為覘自張形勢太宗命囚之親出玄武門馳六騎幸渭水上與頡利隔津而語責以負約俄而衆軍繼至頡利見軍容既盛又知思力就拘

由是大懼遂請和詔許焉即日還宮乙酉又幸便橋與  
頡利刑白馬設盟突厥引退九月丙戌頡利獻馬三千  
疋羊萬口帝不受令頡利歸所掠中國戶口丁未引諸  
衛騎兵統將等習射于顯德殿庭謂將軍已下曰自古  
突厥與中國更有盛衰若軒轅善用五兵即能北逐獯  
鬻周宣驅馳方召亦能制勝太原至漢晉之君逮於隋  
代不使兵士素習干戈突厥來侵莫能抗禦致遺中國  
生民塗炭於寇手我今不使汝等穿池築苑造諸淫費

農民恣令逸樂兵士唯習弓馬庶使汝鬪戰亦望汝前  
無橫敵於是每日引數百人於殿前教射帝親自臨試  
射中者隨賞弓刀布帛朝臣多有諫者曰先王制法有  
以兵刃至御所者刑之所以防萌杜漸備不虞也今引  
裨卒之人彎弧縱矢於軒陛之側陛下親在其間正恐  
禍出非意非所以為社稷計也上不納自是後士卒皆  
為精銳壬子詔私家不得輒立妖神妄設淫祀非禮祠  
禱一皆禁絕其龜易五兆之外諸雜占卜亦皆停斷長

孫無忌封齊國公房玄齡邢國公尉遲敬德吳國公杜如晦蔡國公侯君集潞國公冬十月丙辰朔日有蝕之  
癸亥立中山王承乾為皇太子癸酉裴寂食實封一千  
五百戶長孫無忌王君廓尉遲敬德房玄齡杜如晦一  
千三百戶長孫順德柴紹羅藝趙郡王孝恭一千二百  
戶侯君集張公謹劉師立一千戶李世勣劉弘基九百  
戶高士廉宇文士及秦叔寶程知節七百戶安興貴安  
修仁唐儉寶軌屈突通蕭瑀封德彝劉義節六百戶錢

九隴樊世興公孫武達李孟常段志玄龐卿惲張亮李  
藥師杜淹元仲文四百戶張長遜張平高李安遠李子  
和秦行師馬三寶三百戶十一月庚寅降宗室封郡王  
者並為縣公十二月癸酉親錄囚徒是歲新羅龜茲突  
厥高麗百濟党項並遣使朝貢

貞觀元年春正月乙酉改元辛丑燕郡王李藝據涇州  
反尋為左右所斬傳首京師庚午以僕射竇軌為益州  
大都督三月癸巳皇后親蠶尚書左僕射宋國公蕭瑀



為太子少師丙午詔齊故尚書僕射崔季舒給事黃門  
侍郎郭遵尚書右丞封孝琰等昔仕鄴中名位通顯志  
存忠讜抗表極言無救社稷之亡遂見龍逢之酷其季  
舒子剛遵子雲孝琰子君遵並以門遭時譴淫刑濫及  
宜從褒獎特異常倫可免內侍量才別叙夏四月癸巳  
涼州都督長樂王幼良有罪伏誅六月辛巳尚書右僕  
射密國公封德彝薨壬辰太子少保宋國公蕭瑀為尚  
書左僕射是夏山東諸州大旱令所在賑恤無出今年

租賦秋七月壬子吏部尚書齊國公長孫無忌為尚書  
右僕射八月戊戌貶侍中義興郡公高士廉為安州大  
都督戶部尚書裴矩卒是月關東及河南隴右沿邊諸  
州霜害秋稼九月辛酉命中書侍郎溫彥博尚書右丞  
魏徵等分往諸州賑恤中書令郢國公宇文士及為殿  
中監御史大夫檢校吏部尚書參預朝政安吉郡公杜  
淹署位十二月壬午上謂侍臣曰神仙事本虛妄空有  
其名秦始皇非分愛好遂為方士所詐乃遣童男女數

千人隨徐福入海求仙藥方士避秦苛虐因留不歸始  
皇猶海側跼蹐以待之還至沙丘而死漢武帝為求仙  
乃將女嫁道術人事既無驗便行誅戮據此二事神仙  
不煩妄求也尚書左僕射宋國公蕭瑀坐事免戊申利  
州都督義安王孝常右武衛將軍劉德裕等謀反伏誅  
是歲關中饑至有鬻男女者

二年春正月辛丑尚書右僕射齊國公長孫無忌為開  
府儀同三司徙封漢王恪為蜀王衛王泰為越王楚王

祐為燕王復置六侍郎副六尚書事并置左右司郎中  
各一人前安州大都督趙王元景為雍州牧蜀王恪為  
益州大都督越王泰為揚州大都督二月丙戌鞞鞞內  
屬三月戊申朔日有蝕之丁卯遣御史大夫杜淹巡關  
內諸州出御府金寶贖男女自賣者還其父母庚午大  
赦天下夏四月己卯詔骸骨暴露者令所在埋瘞丙申  
契丹內屬初詔天下州縣並置義倉夏州賊帥梁師都  
為其從父弟洛仁所殺以城降五月大雨雹六月庚寅

皇子治生宴五品以上賜帛有差仍賜天下是日生者  
栗辛卯上謂侍臣曰君雖不君臣不可以不臣裴虔通  
煬帝舊左右也而親為亂首朕方崇獎敬義豈可猶使  
宰民訓俗詔曰天地定位君臣之義以彰卑高既陳人  
倫之道斯著是用篤厚風俗化成天下雖復時經治亂  
主或昏明疾風勁草芬芳無絕剖心焚體赴蹈如歸夫  
豈不愛七尺之軀重百年之命諒由君臣義重名教所  
先故能明大節於當時立清風於身後至如趙高之殞

二世董卓之禍弘農人神所疾異代同憤況凡庸小豎  
有懷凶悖遐觀典策莫不誅夷辰州刺史長蛇縣男裴  
虔通昔在隋代委質晉藩煬帝以舊邸之情特相愛幸  
遂乃志蔑君親潛圖弑逆密伺間隙招結羣醜長戟流  
矢一朝竊發天下之惡孰云可忍宜其夷宗焚首以彰  
大戮但年代異時累逢赦令可特免極刑除名削爵遷  
配驩州秋七月戊申詔萊州刺史牛方裕絳州刺史薛  
世良廣州都督府長史唐奉義隋武牙郎將高元禮並

於隋代俱蒙任用乃協契宇文化及構成弑逆宜依裴  
虔通除名配流嶺表太宗謂侍臣曰天下愚人好犯憲  
章凡赦宥之恩唯及不軌之輩古語曰小人之幸君子  
之不幸一歲再赦好人啗啞凡養稂莠者傷禾稼惠姦  
宄者賊良人昔文王作罰刑茲無赦又蜀先主嘗謂諸  
葛亮曰吾周旋陳元方鄭康成間每見啓告理亂之道  
備矣曾不語赦也夫小人者大人之賊故朕有天下已  
來不甚放赦今四海安靜禮義興行非常之恩施不可

數將恐愚人常冀僥倖唯欲犯法不能改過八月甲戌朔幸朝堂親覽冤屈自是上以軍國無事每日視膳於西宮癸巳公卿奏曰依禮季夏之月可以居臺榭今隆暑未退秋霖方始宮中卑濕請營一閣以居之帝曰朕有氣病豈宜下濕若遂來請糜費良多昔漢文帝將起露臺而惜十家之產朕德不逮于漢帝而所費過之豈謂為民父母之道也竟不許是月河南河北大霜人饑九月丙午詔曰尚齒重舊先王以之垂範還章解組朝



臣於是克終釋菜合樂之儀東膠西序之制養老之義  
遺文可覩朕恭膺大寶憲章故實乞言尊事彌切深衷  
然情存今古世踵澆季而策名就列或乖大體至若筋  
力將盡桑榆且迫徒竭夙興之勤未悟夜行之罪其有  
心驚止足行堪激勵謝事公門收骸閭里能以禮讓固  
可嘉焉内外文武羣官年高致仕抗表去職者參朝之  
日宜在本品見任之上丁未謂侍臣曰婦人幽閉深宮  
情實可愍隋氏末年求採無已至於離宮別館非幸御

之所多聚宮人皆竭人財力朕所不取且灑掃之餘更  
何所用今將出之任求伉儷非獨以惜費亦人得各遂  
其性於是遣尚書左丞戴胄給事中杜正倫等於掖庭  
宮西門簡出之冬十月庚辰御史大夫安吉郡公杜淹  
卒戊子殺瀛州刺史盧祖尚十一月辛酉有事於圓丘  
十二月壬午黃門侍郎王珪為侍中

三年春正月辛亥契丹渠帥來朝戊午謁太廟癸亥親  
耕籍田辛未司空魏國公裴寂坐事免二月戊寅中書

令邢國公房玄齡為尚書左僕射兵部尚書檢校侍中  
蔡國公杜如晦為尚書右僕射刑部尚書檢校中書令  
永康縣公李靖為兵部尚書右丞魏徵為守祕書監參  
預朝政夏四月辛巳太上皇徙居大安宮甲子太宗始  
於太極殿聽政五月周王元方薨六月戊寅以旱親錄  
囚徒遣長孫無忌房玄齡等祈雨於名山大川中書舍  
人杜正倫等往闡內諸州慰撫又令文武官各上封事  
極言得失己卯大風折木秋八月己巳朔日有蝕之薛

延陀遣使朝貢九月癸丑諸州置醫學冬十一月丙午  
西突厥高昌遣使朝貢庚申以并州都督李世勣為通  
漠道行軍總管兵部尚書李靖為定襄道行軍總管以  
擊突厥十二月戊辰突利可汗來奔癸未杜如晦以疾  
辭位許之癸丑詔建義已來交兵之處為義士勇夫殞  
身戎陣者各立一寺命虞世南李伯藥褚亮顏師古岑  
文本許敬宗朱子奢等為之碑銘以紀功業是歲戶部  
奏言中國人自塞外來歸及突厥前後內附開四夷為

州縣者男女一百二十餘萬口

舊唐書卷二

舊唐書卷二考證

太宗本紀卷上太宗又為元帥以擊仁杲相持于折塢

城○新書復屯于高塢城

臣宗萬

按新書地理志寧

州定平縣有高塢城高祖紀薛舉寇涇州不及高塢  
通鑑薛舉進逼高塢新書亦作高塢此獨云折塢應  
誤當以新書為是

貞觀元年春正月以僕射竇軌為益州大都督○沈炳  
震曰軌本傳武德三年拜益州道行臺左僕射九年

行臺廢即授益州大都督貞觀元年徵為右衛大將軍非是年以僕射拜益州也疑誤

三年十一月以并州都督李世勣為通漢道行軍總管  
○李勣傳作通漢道則漢當為漢字之訛

十二月癸丑詔為義士勇夫殞身戎陣者各立一寺○

臣宗萬

按史不言立寺之處其可考証者於汾州破

劉武周則立弘濟寺於呂州破宋老生則立普濟寺  
於晉州破宋金剛則立慈雲寺於印山破王世充則

立昭覺寺於汜水破竇建德則立等慈寺於洺州破  
劉黑闥則立昭福寺征高麗還則立憫忠寺于幽州  
太宗身起行間與士卒同甘苦即位後軫念國殤復  
有是詔亦發政施仁之大端故詳誌於此



舊唐書卷二考證

謹案卷一第一頁後一行熙生天錫案新唐書天  
錫作天賜

第十四頁前八行劉黑闥據漳南反刊本脫南字  
據劉黑闥傳及隋書地理志增

卷二第十一頁前七行通前三萬戶刊本三訛二  
據新唐書改

第二十二頁前三行以并州都督李世勣為通漢  
道行軍總管刊本漢訛漢據李勣傳及本卷考

證改





總校官庶吉士臣侍朝

校對官中書臣張頊

謄錄舉人臣汪志伊

欽定四庫全書會要

史部  
舊唐書卷  
三  
四

詳校官內閣侍讀孫球



欽定四庫全書薈要卷四千九百十五

史部

舊唐書卷三

後晉司空同中書門下平章事劉昫撰

本紀第三

太宗下

四年春正月乙亥定襄道行軍總管李靖大破突厥獲  
隋皇后蕭氏及煬帝之孫正道送至京師癸巳武德殿  
北院火二月己亥幸溫湯甲辰李靖又破突厥于陰山

頡利可汗輕騎遠遁丙午至自溫湯甲寅大赦賜酺五日民部尚書戴胄以本官檢校吏部尚書叅預朝政太常卿蕭瑀為御史大夫與宰臣叅議朝政御史大夫西河郡公溫彥博為中書令三月庚辰大同道行軍副總管張寶相生擒頡利可汗獻於京師甲申尚書右僕射蔡國公杜如晦薨甲午以俘頡利告於太廟夏四月丁酉御順天門軍吏執頡利以獻捷自是西北諸蕃咸請上尊號為天可汗於是降璽書冊命其君長則兼稱之

秋七月甲子朔日有蝕之上謂房玄齡蕭瑀曰隋文何等主對曰克己復禮勤勞思政每一坐朝或至日昃五品已上引之論事宿衛之人傳飧而食雖非性體仁明亦勵精之主也上曰公得其一未知其二此人性至察而心不明夫心暗則照有不通至察則多疑於物自以欺孤寡得之謂羣下不可信任事皆自決雖勞神苦形未能盡合於理朝臣既知上意亦復不敢直言宰相已下承受而已朕意不然以天下之廣豈可獨斷一人之



慮朕方選天下之才為天下之務委任責成各盡其用  
庶幾於理也因令有司詔勅不便於時即宜執奏不得  
順旨施行八月丙午詔三品已上服紫五品已上服緋  
六品七品以綠八品九品以青婦人從夫色甲寅兵部  
尚書代國公李靖為尚書左僕射九月庚午令收瘞長  
城之南骸骨仍令致祭壬午令自古明王聖帝賢臣烈  
士墳墓無得芻牧春秋致祭冬十月壬辰幸隴州曲赦  
隴岐二州給復一年十日校獵於貴泉谷十三日校獵

於魚龍川自射鹿獻於大安宮甲子至自隴州戊寅制  
決罪人不得鞭背以明堂孔穴針灸之所兵部尚書侯  
君集叅議朝政十二月辛亥開府儀同三司淮安王神  
通薨甲寅高昌王麴文泰來朝是歲斷死刑二十九人  
幾致刑措東至于海南至于嶺皆外戶不閉行旅不齎  
糧焉

五年正月癸酉大蒐於昆明池蕃夷君長咸從丙午親  
獻禽於大安宮己卯幸左藏庫賜三品已上帛任其輕

重癸未朝集使請封禪乙酉封皇弟元裕為鄒王元名  
為譙王靈夔為魏王元祥為許王元曉為密王庚戌封  
皇子愔為梁王貞為漢王暉為郟王治為晉王慎為申  
王囂為江王簡為代王夏四月壬辰代王簡薨以金帛  
購中國人因隋亂沒突厥者男女八萬人盡還其家屬  
六月甲寅太子少師新昌縣公李綱薨七月甲辰遣使  
毀高麗所立京觀收隋人骸骨祭而葬之戊申初今天  
下決死刑必三覆奏在京諸司五覆奏其日尚食進蔬

食內教坊及太常不舉樂秋九月乙丑賜羣官大射於  
武德殿冬十月右衛大將軍順州都督北平郡王阿史  
那什鉢苾卒十二月壬寅幸溫湯癸卯獵於驪山丙午  
賜新豐高年帛有差戊申至自溫湯

六年春正月乙卯朔日有蝕之二月丙戌置三師官員  
戊子初置律學三月戊辰幸九成宮六月己亥鄴王元  
亨薨辛亥江王囂薨冬十月乙卯至自九成宮十二月  
辛未親錄囚徒歸死罪者二百九十人于家令明年秋

末就刑其後應期畢至詔悉原之是歲党項羌前後內屬者三十萬口

七年春正月戊子詔曰字文化及弟智及司馬德戡裴虔通孟景元禮楊覽唐奉義牛方裕元敏薛良馬舉元武達李孝本李孝質張愷許弘仁令狐行達席德方李覆等大業季年咸居列職或恩結一代任重一時乃包藏凶慝罔思忠義爰在江都遂行弑逆罪百閭趙襲深梟獍雖事是前代歲月已久而天下之惡古今同棄宜

寘重典以勵臣節其子孫並宜禁錮勿令齒叙是日上  
製破陣樂舞圖辛丑賜京城酺三日丁卯雨土乙酉薛  
延陞遣使來朝庚寅秘書監檢校侍中魏徵為侍中癸  
巳直太史將仕郎李淳風鑄渾天黃道儀奏之置於凝  
暉閣夏五月癸未幸九成宮八月山東河南三十州大  
水遣使賑恤冬十月庚申至自九成宮十一月丁丑頒  
新定五經壬辰開府儀同三司齊國公長孫無忌為司  
空十二月丙辰狩于少陵原詔以少牢祭杜如晦杜淹

李綱之墓

八年正月癸未右衛大將軍阿史那吐苾卒辛丑右屯  
衛大將軍張士貴討東西五洞反獠平之壬寅命尚書  
右僕射李靖特進蕭瑀楊恭仁禮部尚書王珪御史大  
夫韋挺鄜州大都督府長史皇甫無逸揚州大都督府  
長史李襲譽幽州大都督府長史張亮涼州大都督李  
大亮右領軍大將軍竇誕太子左庶子杜正倫綿州刺  
史劉德威黃門侍郎趙弘智使于四方觀省風俗二月

乙巳皇太子加元服丙午賜天下酺三日三月庚辰幸  
九成宮五月辛未朔日有蝕之丁丑上初服翼善冠貴  
臣服進德冠七月始以雲麾將軍階為從三品隴右山  
崩大蛇屢見山東河南淮南大水遣使賑恤八月甲子  
有星孛于虛危歷于氐十一月上旬乃滅九月丁丑皇  
太子來朝冬十月右驍衛大將軍襲國公段志玄擊吐  
谷渾破之追奔八百餘里甲子至自九成宮十一月辛  
未右僕射代國公李靖以疾辭官授特進丁亥吐谷渾



寇源州己丑吐谷渾拘我行人趙道德十二月辛丑命  
特進李靖兵部尚書侯君集刑部尚書任城王道宗涼  
州都督李大亮等為大總管各帥師分道以討吐谷渾  
壬子越王泰為雍州牧乙卯帝從太上皇閱武於城西  
是歲龜茲吐蕃高昌女國石國遣使朝貢

九年春三月洮州羌叛殺刺史孔長秀壬午大赦每鄉  
置長一人佐二人乙酉鹽澤道總管高甌生大破叛羌  
之衆庚寅勅天下戶立三等未盡升降置為九等夏四

月壬寅康國獻獅子閏月丁卯日有蝕之癸巳大總管  
李靖侯君集李大亮任城王道宗破吐谷渾於牛心堆  
五月乙未又破之於烏海追奔至烏海副總管薛萬均  
薛萬徹又破之於赤水源獲其名王二十人庚子太上  
皇崩於大安宮壬子李靖平吐谷渾於西海之上獲其  
王慕容伏允以其子慕容順光降封為西平郡王復其  
本國秋七月甲寅增修太廟為六室冬十月庚寅葬高  
祖太武皇帝於獻陵戊申祔于太廟辛丑左僕射魏國

公房立齡加開府儀同三司餘如故十二月甲戌吐谷  
渾西平郡王慕容順光為其下所弑遣兵部尚書侯君  
集率師安撫之仍封順光子諾曷鉢為河源郡王使統  
其衆右光祿大夫宋國公蕭瑀依舊特進復令叅預朝  
政

十年春正月壬子尚書左僕射房立齡侍中魏徵上梁  
陳齊周隋五代史詔藏于秘閣癸丑徙封趙王元景為  
荆王魯王元昌為漢王鄭王元禮為徐王徐王元嘉為

韓王荆王元則為彭王滕王元懿為鄭王吳王元軌為  
霍王幽王元鳳為號王陳王元慶為道王魏王靈夔為  
燕王蜀王恪為吳王越王泰為魏王燕王祐為齊王梁  
王愔為蜀王邕王暉為蔣王漢王貞為越王申王慎為  
紀王夏六月以侍中魏徵為特進仍知門下省事壬申  
中書令溫彥博為尚書右僕射甲戌太常卿安德郡公  
楊師道為侍中己卯皇后長孫氏崩于立政殿冬十一  
月庚寅葬文德皇后於昭陵十二月壬申吐谷渾河源

郡王慕容諾曷鉢來朝乙亥親錄京師囚徒是歲關內  
河東疾病命醫齋藥療之

十一年春正月丁亥朔徙鄆王元裕為鄧王譙王元名  
為舒王癸巳加魏王泰為雍州牧左武侯大將軍庚子  
頒新律令於天下作飛山宮甲寅房玄齡等進所修五  
禮詔所司行用之二月丁亥詔曰夫生者天地之大德  
壽者修短之一期生有七尺之形壽以百齡為限含靈  
稟氣莫不同焉皆得之於自然不可以分外企也是以

禮記云君即位而為禕莊周云勞我以形息我以死豈  
非聖人遠鑒通賢深識末代已來明辟蓋寡靡不矜黃  
屋之尊慮白駒之過並多拘忌有慕遐年謂雲車易乘  
羲輪可駐異軌同趣其蔽甚矣有隋之季海內橫流豺  
狼肆暴吞噬黔首朕投袂發憤情深拯溺扶翼義師濟  
斯塗炭賴蒼昊降鑒股肱宣力提劍指麾天下大定此  
朕之宿志於斯已畢猶恐身後之日子子孫孫習於流  
俗猶循常禮加四重之櫬伐百祀之木勞擾百姓崇厚

園陵今預為此制務從儉約於九嶷之山足容棺而已  
積以歲月漸而備之木馬塗車土桴葦籥事合古典不  
為時用又佐命功臣或義深舟楫或謀定帷幄或身摧  
行陣同濟艱危克成鴻業追念在昔何日忘之使逝者  
無知咸歸寂寞若營魂有識還如疇曩居止相望不亦  
善乎漢氏使將相陪陵又給以東園秘器篤終之義恩  
意深厚古人豈異我哉自今已後功臣密戚及德業佐  
時者如有薨亡宜賜塋地一所及以秘器使窆窆之時

喪事無闕所司依此營備稱朕意焉甲子幸洛陽宮命  
祭漢文帝三月丙戌朔日有蝕之丁亥車駕至洛陽丙  
申改洛州為洛陽宮辛亥大蒐於廣城澤癸丑還宮夏  
四月甲子震乾元殿前槐樹丙寅詔河北淮南舉孝悌  
淳篤兼閑時務儒術該通可為師範文辭秀美才堪著  
述明識政體可委字人并志行修立為鄉閭所推者給  
傳詣洛陽宮六月甲寅尚書右僕射虞國公溫彥博薨  
丁巳幸明德宮己未定制諸王為世封刺史戊辰定制



勲臣為世封刺史改封任城王道宗為江夏郡王趙郡王孝恭為河間郡王己巳改封許王元祥為江王秋七月癸未大霖雨穀水溢入洛陽宮深四尺壞左掖門毀宮寺十九所洛水溢漂六百家庚寅詔以災命百官上封事極言得失丁酉車駕還宮壬寅廢明德宮及飛山宮之玄圃院分給遭水之家仍賜帛有差丙午修老君廟於亳州宣尼廟於兗州各給二十戶享祀焉涼武昭王復近墓二十戶充守衛仍禁芻牧樵採九月丁亥河

溢壞陝西河北縣毀河陽中潭幸白司馬坂以觀之賜  
遭水之家粟帛有差冬十一月辛卯幸懷州乙未狩於  
濟源丙午車駕還宮十二月辛酉百濟王遣其太子隆  
來朝

十二年春正月乙未吏部尚書高士廉等上氏族志一  
百三十卷壬寅松叢二州地震壞人廬舍有壓死者二  
月乙卯車駕還京癸亥觀砥柱勒銘以紀功德甲子夜  
郎獠反夔州都督齊善行討平之乙丑次陝州自新橋

幸河北縣祀夏禹廟丁卯次柳谷頓觀鹽池戊寅以隋  
鷹揚郎將堯君素忠於本朝贈蒲州刺史仍錄其子孫  
閏二月庚辰朔日有蝕之丙戌至自洛陽宮夏五月壬  
申銀青光祿大夫永興縣公虞世南卒六月庚子初置  
玄武門左右飛騎秋七月癸酉吏部尚書申國公高士  
廉為尚書右僕射冬十月乙卯狩于始平賜高年粟帛  
有差乙未至自始平己亥百濟遣使貢金甲雕斧十二  
月辛巳右武侯將軍上官懷仁大破山獠於壁州

十三年春正月乙巳朔謁獻陵曲赦三原縣及行從大  
辟罪丁未至自獻陵戊午加房玄齡為太子少師二月  
丙子停世襲刺史三月乙丑有星孛于畢昴夏四月戊  
寅幸九成宮甲申阿史那結社爾犯御營伏誅壬寅雲  
陽石燃者方丈晝如灰夜則有光投草木於上則焚歷  
年而止自去冬不雨至于五月甲寅避正殿令五品以  
上上封事減膳罷役分使賑恤申理冤屈乃雨六月丙  
申封皇弟元嬰為滕王秋八月辛未朔日有蝕之庚辰

立右武侯大將軍化州都督懷化郡王李思摩為突厥  
可汗率所部建牙于河北冬十月甲申至自九成宮十  
一月辛亥侍中安德郡公楊師道為中書令十二月丁  
丑吏部尚書陳國公侯君集為交河道行軍大總管帥  
師伐高昌乙亥封皇子福為趙王壬午雋州都督王志  
遠有罪伏誅詔於洛相幽徐齊并秦蒲等州並置常平  
倉己丑吐谷渾河源郡王慕容諾曷鉢來逆女壬辰狩  
于咸陽是歲滁州言野蠶食柵葉成繭大如柰其色綠

凡六千五百七十碩高麗新羅西突厥吐火羅康國安  
國波斯踈勒于闐焉耆高昌林邑昆明及荒服蠻酋相  
次遣使朝貢

十四年春正月庚子初命有司讀時令甲寅幸魏王泰  
宅赦雍州及長安獄大辟罪已下二月丁丑幸國子學  
親釋奠赦大理萬年繫囚國子祭酒以下及學生高第  
精勤者加一級賜帛有差庚辰左驍衛將軍淮陽王道  
明送弘化公主歸于吐谷渾壬午幸溫湯辛卯至自溫

湯乙未詔以梁皇侶褚仲都周熊安生沈重陳沈文阿  
周弘正張機隋何妥劉焯劉炫等前代名儒學徒多行  
其義命求其後三月戊午置寧朔大使以護突厥夏五  
月壬戌徙封燕王靈夔為魯王六月乙酉大風拔木己  
丑薛延陀遣使求婚己未滁州野蠶成繭凡收八千三  
百碩八月庚午新作襄城宮癸巳交河道行軍大總管  
侯君集平高昌以其地置西州九月癸卯曲赦西州大  
辟罪乙卯於西州置安西都護府冬十月己卯詔以贈

司空河間元王孝恭贈陝東道大行臺尚書右僕射鄖  
節公殷開山贈民部尚書渝襄公劉政會等配饗高祖  
廟庭閏月乙未幸同州甲辰狩于堯山庚戌至自同州  
丙辰吐蕃遣使獻黃金器千斤以求婚十一月甲子朔  
日南至有事于圓丘十二月丁酉交河道旋師吏部尚  
書陳國公侯君集執高昌王麴智盛獻捷于觀德殿行  
飲至之禮賜酺三日乙卯高麗世子相權來朝

十五年春正月丁卯吐蕃遣其國相祿東贊來逆女丁



丑禮部尚書江夏王道宗送文成公主歸吐蕃辛巳幸  
洛陽宮三月戊申幸襄城宮庚午發襄城宮夏四月辛  
卯詔以來年二月有事太山所司詳定儀制五月壬申  
并州僧道及老人等抗表以太原王業所因明年登封  
已後願時臨幸上於武成殿賜宴因從容謂侍臣曰朕  
少在太原喜羣聚博戲暑往寒逝將三十年矣時會中  
有舊識上者相與道舊以為笑樂因謂之曰他人之言  
或有面諛公等朕之故人實以告朕即日政教於百姓

何如人間得無疾苦耶皆奏即日四海太平百姓歡樂  
陛下力也臣等餘年日惜一日但眷戀聖化不知疾苦  
因固請過并州上謂曰飛鳥過故鄉猶躑躅徘徊况朕  
於太原起義遂定天下復少小遊觀誠所不忘岱禮若  
畢或冀與公等相見於是賜物各有差丙子百濟王扶  
餘璋卒詔立其世子扶餘義慈嗣其父位仍封為帶方  
郡王六月戊申詔天下諸州舉學綜古今及孝悌淳篤  
文章秀異者並以來年二月總集泰山己酉有星孛于

太微犯郎位丙辰停封泰山避正殿以思咎命食減膳  
秋七月甲戌孛星滅冬十月辛卯大閱於伊闕壬辰幸  
嵩陽辛丑還宮十一月壬戌廢鄉長壬申還京師癸酉  
薛延陀以同羅僕骨廻紇靺鞨靺鞨之衆度漠屯于白道  
川命營州都督張儉統所部兵壓其東境兵部尚書李  
勣為朔方行軍總管右衛大將軍李大亮靈州道行軍  
總管涼州都督李襲譽為涼州道行軍總管分道以禦  
之十二月戊子朔至自洛陽宮甲辰李勣及薛延陀戰

于諾真水大破之斬首三千餘級獲馬萬五千匹薛延陀跳身而遁勣旋破突厥思結於五臺縣虜其男女千餘口獲羊馬稱是

十六年春正月辛未詔在京及諸州死罪囚徒配西州為戶流人未達前所者徙防西州兼中書侍郎江陵子岑文本為中書侍郎專知機密夏六月辛卯詔復隱王建成曰隱太子改封海陵刺王元吉曰巢刺王秋七月戊午司空趙國公無忌為司徒尚書左僕射梁國公玄

齡為司空九月丁巳特進鄭國公魏徵為太子太師知門下省事如故冬十一月丙辰狩于岐山辛酉使祭隋文帝陵丁卯宴武功士女於慶善宮南門酒酣上與父老等涕泣論舊事老人等遞起為舞爭上萬歲壽上各盡一杯庚午至自岐州十二月癸卯幸溫湯甲辰狩于驪山時陰寒晦冥圍兵斷絕上乘高望見之欲捨其罰恐虧軍令乃迴轡入谷以避之是歲高麗大臣蓋蘇文弑其君高武而立武兄子藏為王

十七年春正月戊辰右衛將軍代州都督劉蘭謀反腰

斬太子太師鄭國公魏徵薨戊申詔圖畫司徒趙國公

無忌等勲臣二十四人於凌煙閣三月丙辰齊州都督

齊王祐長史權萬紀典軍韋文振據齊州自守詔兵部

尚書李勣刑部尚書劉德威發兵討之兵未至兵曹杜

行敏執之而降遂賜死于內侍省丁巳熒惑守心前星

十九日而退夏四月庚辰朔皇太子有罪廢為庶人漢

王元昌吏部尚書侯君集並坐與連謀伏誅丙戌立晉

王治為皇太子大赦賜酺三日丁亥中書令楊師道為  
吏部尚書己丑加司徒趙國公長孫無忌太子太師司  
空梁國公房玄齡太子太傅特進宋國公蕭瑀太子太  
保兵部尚書英國公李勣為太子詹事仍同中書門下  
三品庚寅上親謁太廟以謝承乾之過癸巳魏王泰以  
罪降爵為東萊郡王五月乙丑手詔舉孝廉茂才異能  
之士六月己卯朔日有蝕之壬午改葬隋恭帝丁酉尚  
書右僕射高士廉請致仕詔以為開府儀同三司同中

書門下三品閏月戊午薛延陀遣其兄子突利設獻馬  
五萬匹牛駝一萬羊十萬以請婚許之丙子徙封東萊  
郡王泰為順陽王秋七月庚辰京城訛言云上遣棖棖  
取人心肝以祠天狗遞相驚悚上遣使遍加宣諭月餘  
乃止丁酉司空太子太傅梁國公房玄齡以母憂罷職  
八月工部尚書鄖國公張亮為刑部尚書叅預朝政九  
月癸未徙庶人承乾于黔州冬十月丁巳房玄齡起復  
本職十一月己卯有事于南郊壬午賜天下酺三日以



涼州獲瑞石曲赦涼州并錄京城及諸州繫囚多所原宥

十八年春正月壬寅幸溫湯夏四月辛亥幸九成宮秋八月甲子至自九成宮丁卯散騎常侍清苑男劉洎為侍中中書侍郎江陵子岑文本中書侍郎馬周並為中書令九月黃門侍郎褚遂良叅預朝政冬十月辛丑朔日有蝕之甲辰初置太子司議郎官員甲寅幸洛陽宮安西都護郭孝恪帥師滅焉耆執其王突騎支送行在

所十一月壬寅車駕至洛陽宮庚子命太子詹事英國  
公李勣為遼東道行軍總管出柳城禮部尚書江夏郡  
王道宗副之刑部尚書鄖國公張亮為平壤道行軍總  
管以舟師出萊州左領軍常何瀘州都督左難當副之  
發天下甲士召募十萬並趣平壤以伐高麗十二月辛  
丑庶人承乾死

十九年春正月庚戌上親統六軍發洛陽乙卯詔皇太  
子留定州監國開府儀同三司申國公高士廉攝太子

太傅與侍中劉洎中書令馬周太子少詹事張行成太子右庶子高季輔五人同掌機務以吏部尚書安德郡公楊師道為中書令贈殷比干為太師諡曰忠烈命所司封墓葺祠堂春秋祠以少牢上自為文以祭之三月壬辰上發定州以司徒太子太師兼檢校侍中趙國公長孫無忌中書令岑文本楊師道從夏四月癸卯誓師於幽州城南因大饗六軍以遣之丁未中書令岑文本卒于師癸亥遼東道行軍大總管英國公李世勣攻蓋

牟城破之五月丁丑車駕渡遼甲申上親率鐵騎與李  
世勣會圍遼東城因烈風發火弩斯須城上屋及樓皆  
盡麾戰士令登乃拔之六月丙辰師至安市城丁巳高  
麗別將高延壽高惠真帥兵十五萬來援安市以拒王  
師李世勣率兵奮擊上自高峰引軍臨之高麗大潰殺  
獲不可勝紀延壽等以其衆降因名所幸山為駐蹕山  
刻石紀功焉賜天下大酺二日秋七月李世勣進軍攻  
安市城至九月不剋乃班師冬十月丙辰入臨渝關皇

太子自定州迎謁戊午次漢武臺刻石以紀功德十一月辛未幸幽州癸酉大饗還師十二月戊申幸并州侍中清苑男劉洎以罪賜死是歲薛延陀真珠毗伽可汗死

二十年正月上在并州丁丑遣大理卿孫伏伽黃門侍郎褚遂良等二十二人以六條巡察四方黜陟官吏庚辰曲赦并州宴從官及起義元從賜粟帛給復有差三月己巳車駕至京師己丑刑部尚書鄭國公張亮謀反

誅閏月癸巳朔日有蝕之夏四月甲子太子太師趙國  
公長孫無忌太子太傅梁國公房玄齡太子太保宋國  
公蕭瑀各辭調護之職詔許之六月遣兵部尚書固安  
公崔敦禮特進英國公李世勣擊破薛延陀於鬱督軍  
山北前後斬首五千餘級虜男女三萬餘人秋八月甲  
子封皇孫為陳王己巳幸靈州庚午次涇陽頓鐵勒迴  
紇拔野古同羅僕骨多濫葛思結阿跌契苾跌結渾斛  
薛等十一姓各遣使朝貢奏稱延陀可汗不事大國部

落鳥散不知所之奴等各分地不能逐延陀去歸命  
天子乞置漢官詔遣會靈州九月甲辰鐵勒諸部落俟  
斤頡利發等遣使相繼而至靈州者數千人來貢方物  
因請置吏咸請至尊為可汗於是北荒悉平為五言詩  
勒石以序其事辛亥靈州地震有聲冬十月前太子太  
保宋國公蕭瑀貶商州刺史丙戌至自靈州

二十一年春正月壬辰開府儀同三司申國公高士廉  
薨丁酉詔以來年二月有事泰山甲寅賜京師酺三日

二月壬申詔以左丘明卜子夏公羊高穀梁赤伏勝高  
堂生戴聖毛萇孔安國劉向鄭衆杜子春馬融盧植鄭  
康成服子慎何休王肅王輔嗣杜元凱范甯等二十一  
人代用其書垂於國胄自今有事於太學並命配享宣  
尼廟堂丁丑皇太子於國學釋菜夏四月乙丑營太和  
宮於終南之上改為翠微宮五月戊子幸翠微宮六月  
癸亥司徒趙國公無忌加授揚州都督秋七月庚子建  
玉華宮於宜君縣之鳳凰谷庚戌至自翠微宮八月壬



戊詔以河北大水停封禪辛未骨利幹國遣使貢名馬  
丁酉封皇子明為曹王冬十一月癸卯徙封順陽王泰  
為濮王十二月戊寅左驍衛大將軍阿史那社爾右驍  
衛大將軍契苾何力安西都護郭孝恪司農卿楊弘禮  
為崑山道行軍大總管以伐龜茲是歲墮婆登乙利鼻  
林送都播羊同石破斯康國吐火羅阿悉吉等遠夷十  
九國並遣使朝貢又於突厥之北至于迴紇部落置驛  
六十六所以通北荒焉

二十二年春正月庚寅中書令馬周卒司徒趙國公無

忌兼檢校中書令知中書門下二省事己亥刑部侍郎

崔仁師為中書侍郎叅知機務戊戌辛溫湯戊申還宮

二月前黃門侍郎褚遂良起復黃門侍郎中書侍郎崔

仁師除名配流連州癸丑西番沙鉢羅葉護率衆歸附

以其俟斤屈裴祿為忠武將軍兼大俟斤戊午以結骨

部置堅昆都督乙亥幸玉華宮乙卯賜所經高年篤疾

粟帛有差己卯蒐于華原四月甲寅磧外蕃人爭牧馬

出界上親臨斷決然後咸服丁巳右武侯將軍梁建方  
擊松外蠻下其部落七十二所五月庚子右衛長史王  
玄策擊帝那伏帝國大破之獲其王阿羅那順及王妃  
子等虜男女萬二千人牛馬二萬餘以詣闕使方士那  
羅遁娑婆於金甌門造延年之藥吐蕃贊普擊破中天  
竺國遣使獻捷六月癸酉特進宋國公蕭瑀薨秋七月  
癸卯司空梁國公房玄齡薨八月己酉朔日有蝕之九  
月己亥黃門侍郎褚遂良為中書令十月癸亥至自王

華宮十一月戊戌眉印雅三州獠反右衛將軍梁建方  
討平之庚子契丹帥窟哥奚帥可度者並率其部內屬  
以契丹部為松漠都督以奚部置饒樂都督十二月乙  
卯增置殿中侍御史監察御史各二員大理寺置平事  
十員閏月丁丑朔崑山道總管阿史那社爾降處密處  
月破龜茲大撥等五十城虜數萬口執龜茲王訶黎布  
失畢以歸龜茲平西域震駭副將薛萬徹脇于闐王伏  
閣信入朝癸未新羅王遣其相伊贊千金春秋及其子

文王來朝是歲新羅女王金善德死遣冊立其妹真德  
為新羅王

二十三年春正月辛亥俘龜茲王訶黎布失畢及其相  
那利等獻于社廟二月丙戌置瑤池都督府隸安西都  
護府丁亥西突厥肆葉護可汗遣使來朝三月丙辰置  
鄯州都督府自去冬不雨至于此月己未乃雨辛酉大  
赦丁卯勅皇太子於金液門聽政是月日赤無光四月  
己亥幸翠微宮五月戊午太子詹事英國公李世勣為

疊州都督辛酉開府儀同三司衛國公李靖薨己巳上  
崩於含風殿年五十二遺詔皇太子即位於柩前喪紀  
宜用漢制秘不發喪庚午遣舊將統飛騎勁兵從皇太  
子先還京發六府甲士四千人分列於道及安化門翼  
從乃入大行御馬輿從官侍御如常壬申發喪六月甲  
戌朔殯于太極殿八月丙子百寮上謚曰文皇帝廟號  
太宗庚寅葬昭陵上元元年八月改上尊號曰文武聖  
皇帝天寶十三載二月改上尊號為文武大聖大廣孝

皇帝

史臣曰臣觀文皇帝發迹多奇聰明神武拔人物則不私於黨負志業則咸盡其才所以屈突尉遲由仇敵而願傾心脅馬周劉洎自疎遠而卒委鈞衡終平泰階諒由斯道嘗試論之礎潤雲興蟲鳴螽躍雖堯舜之聖不能用樛杌窮奇而治平伊呂之賢不能為夏桀殷辛而昌盛君臣之際遭遇斯難以至抉目剖心蟲流筋擢良由遭值之異也以房魏之智不踰于丘軻遂能尊主庇

民者遭時也或曰以太宗之賢失愛於昆弟失教於諸子何也曰然舜不能仁四罪堯不能訓丹朱斯前志也當神堯任讒之年建成忌功之日苟除畏偏孰顧分崩變故之興間不容髮方懼毀巢之禍寧虞尺布之謠承乾之愚聖父不能移也若文皇自定儲於哲嗣不騁志於高麗用人如貞觀之初納諫比魏徵之日况周發周成之世襲我有遺妍較漢文漢武之恢弘彼多慙德迹其聽斷不惑從善如流千載可稱一人而已



贊曰昌發啓國一門三聖文定高位友于不令管蔡既  
誅成康道正貞觀之風到今歌詠

舊唐書卷三

舊唐書卷三考證

太宗本紀卷下五年七月初令天下決死刑必三覆奏  
在京諸司五覆奏○新書在十二月丁亥綱目亦在  
十二月

九年夏閏四月丁卯日有蝕之○新書作丙寅朔据五  
行志當從新書

十三年夏四月阿史那結社爾犯御營伏誅○新書作  
阿史那結社率反綱目同新書

二十二年二月中書侍郎崔仁師除名配流連州○本傳作龔州

五月庚子右衛長史王玄策擊帝那伏帝國大破之○天竺國傳作擊那伏帝國無上一帝字

十一月戊戌眉邛雅三州獠反右衛將軍梁建方討平之○新書在九月壬寅綱目在十月

舊唐書卷三考證

欽定四庫全書薈要卷四千九百十六

史部

舊唐書卷四

後晉司空同中書門下平章事劉 昫撰

本紀第四

高宗上

高宗天皇大聖大弘孝皇帝諱治太宗第九子也母曰  
文德順聖長孫皇后以貞觀二年六月生於東宮之麗  
正殿五年封晉王七年遙授并州都督幼而岐嶷端審

寬仁孝友初授孝經於著作郎蕭德言太宗問曰此書  
中何言爲要對曰夫孝始於事親中於事君終於立身  
君子之事上進思盡忠退思補過將順其美匡救其惡  
太宗大悅曰行此足以事父兄爲臣子矣及文德皇后  
崩晉王時年九歲哀慕感動左右太宗屢加慰撫由是  
特深寵異尋拜右武侯大將軍十七年皇太子承乾廢  
魏王泰亦以罪黜太宗與長孫無忌房玄齡李勣等計  
議立晉王爲皇太子太宗每視朝常令在側觀決庶政

或令參議太宗數稱其善十八年太宗將伐高麗命太子留鎮定州及駕發有期悲啼累日因請飛驛遞表起居并遞勅垂報並許之飛表奏事自此始也及軍旋太子從至并州時太宗患癰太子親吮之扶輦步從數日二十三年五月己巳太宗崩庚午以禮部尚書兼太子少師黎陽縣公于志寧為侍中太子少詹事兼尚書左丞張行成為兼侍中檢校刑部尚書太子右庶子兼吏部侍郎攝戶部尚書高季輔為兼中書令檢校吏部尚

書太子左庶子高陽縣男許敬宗兼禮部尚書辛未還京六月甲戌朔皇太子即皇帝位時年二十二詔曰大行皇帝奄棄普天痛貫心靈若寘湯火思遵太孝不敢減身永慕長號將何逮及粵以孤眇屬當元嗣思勵空薄康濟黎元敬順惟新仰昭先德宣布凱澤被乎億兆可大赦天下内外文武賜勲官一級諸年八十以上賚以粟帛雍州及諸州比年供軍勞役尤甚之處並給復一年辛巳改民部尚書爲戶部尚書疊州都督英國公

勣爲特進檢校洛州刺史仍於洛陽宮留守癸未詔司徒揚州都督趙國公無忌爲太尉兼檢校中書令知尚書門下二省事餘並如故賜物三千段癸巳特進英國公勣爲開府儀同三司同中書門下三品秋七月丙午改治書侍御史爲御史中丞諸州治中爲司馬別駕爲長史治禮郎爲奉禮郎以避上名以貞觀時不諱先帝二字詔有司奏曰先帝二名禮不偏諱上既單名臣子不令指斥上乃從之己酉于闐王伏闕信來朝八月癸



酉朔河東地震晉州尤甚壞廬舍壓死者五千餘人三日又震詔遣使存問給復二年壓死者賜絹三匹以開府儀同三司英國公勣爲尚書左僕射同中書門下三品僕射始帶同中書門下庚寅葬太宗於昭陵九月甲寅加授鄜州刺史荆王元景爲司徒前安州都督吳王恪爲司空兼梁州刺史丙寅贈太尉梁國公玄齡贈司徒申國公士廉贈左僕射蔣國公屈突通並可配食太宗廟庭冬十一月甲子以瑤池都督阿史那賀魯爲左

驍衛大將軍乙丑晉州地又震是冬無雪

永徽元年春正月辛丑朔上不受朝詔改元壬寅御太極殿受朝而不會丙午立妃王氏爲皇后丁未以陳王忠爲雍州牧二月辛卯封皇子孝爲許王上金爲杞王素節爲雍王夏四月己巳朔晉州地又震五月丁未上謂羣臣曰朕謬膺大位政教不明遂使晉州之地屢有震動良由賞罰失中政道乖方卿等宜各進封事極言得失以匡不逮吐火羅遣使獻大鳥如駝食銅鐵上遣

獻于昭陵吐蕃贊普死遣右武衛將軍鮮于匡濟齎璽書往弔祭六月庚辰晉州地震秋七月丙寅以旱親錄京城囚徒九月癸卯右驍衛郎將高侃執車鼻可汗詣闕獻于社廟及昭陵己未尚書左僕射英國公勣固請解職許之令以開府儀同三司同中書門下三品十一月己未中書令河南郡公褚遂良左授同州刺史十二月瑤池都督沙鉢羅葉護阿史那賀魯以府叛自稱可汗總有西域之地是歲雍絳同等九州旱蝗齊定等十

# 六州水

二年春正月戊戌詔曰去歲關輔之地頗弊蝗螟天下諸州或遭水旱百姓之間致有罄乏此由朕之不德兆庶何辜矜物罪已載深憂惕今獻歲肇春東作方始糧廩或空事資賑給其遭蟲水處有貧乏者得以正義倉賑貸雍同二州各遣郎中一人充使存問務盡哀矜之旨副朕乃眷之心乙巳黃門侍郎平昌縣公宇文節加銀青光祿大夫依舊同中書門下三品守中書侍郎柳

與爲中書侍郎依舊同中書門下三品夏四月乙酉秩  
太廟令及獻昭二陵令從五品丞從七品五月壬辰開  
府儀同三司及京官文武職事四品五品並給隨身魚  
六月辛酉開府儀同三司襄邑王神符薨秋七月丁未  
賀魯寇陷金嶺城蒲類縣遣武侯大將軍梁建方右驍  
衛大將軍契苾何力爲弓月道總管以討之八月乙丑  
大食國始遣使朝獻己巳侍中燕國公于志寧爲尚書  
左僕射侍中兼刑部尚書北平縣公張行成爲尚書左

僕射並同中書門下三品猶不入銜中書令兼檢校吏部尚書脩縣公高季輔爲侍郎九月癸巳改九成宮爲萬年宮廢玉華宮以爲佛寺閏月辛未頒新定律令格式於天下冬十月辛卯晉州地震十一月辛酉有事於南郊戊辰定襄地震丁丑以高昌故地置安西都護府白水蠻寇麻州命左領軍將軍趙孝祖討平之

三年春正月癸亥以去秋至于是月不雨上避暑正殿降天下死罪及流罪遞減一等徒以下咸宥之弓月道總

管梁建方契苾何力等大破處月朱耶孤注於牢山斬首九千級虜渠帥六十俘生口萬餘獲牛馬雜畜七萬丙寅太尉趙國公無忌以旱請遜位不許己巳同州刺史河南郡公褚遂良為吏部尚書門下三品丙子親祠太廟丁亥籍于千畝賜羣官帛有差三月辛巳黃門侍郎平昌縣公宇文節為侍中中書侍郎柳奭為中書令庚申幸觀德殿賜文武羣官大射夏四月庚寅左領軍將軍趙孝祖大破白水蠻大勃律甲午澧州刺史彭王

元則薨五月庚辰詔以周司沐大夫裴融齊侍中崔季舒給事黃門侍郎裴澤尚書左丞封孝琰隋儀同三司豆盧毓御史中丞游楚客等並門挺忠鯁其子孫各宜甄擢秋七月丁巳立陳王忠爲皇太子大赦天下五品已上子爲父後者賜勲一轉大酺三日乙丑左僕射于志寧兼太子少師右僕射張行成兼太子少傅侍中高季輔兼太子少保侍中宇文節兼太子詹事丁丑上問戶部尚書高履行去年進戶多少履行奏稱進戶總一



十五萬又問曰隋日有幾戶今見有幾戶履行奏隋開  
皇中有戶八百七十萬即今見有戶三百八十萬九月  
丁巳改太子中允爲內允中書舍人爲內史舍人諸率  
府中郎將改爲旅賁郎以避太子名冬十月戊戌幸同  
安大長公主第又幸高陽長公主第即日還宮十一月  
乙亥駁馬國遣使朝貢庚寅弘化長公主自吐谷渾來  
朝十二月癸巳濮陽王泰薨

四年春正月癸丑朔上臨軒不受朝以濮王泰在殯故

也丙子新除房州刺史駙馬都尉房遺愛司徒秦州刺

史荆王元景司空安州刺史吳王恪寧州刺史駙馬都

尉薛萬徹嵐州刺史駙馬都尉柴令武謀反二月乙酉

遺愛萬徹令武等並伏誅元景恪巴陵高陽公主並賜

死左驍衛大將軍安國公執失思力配流雋州侍中兼

太子詹事平昌縣公宇文節配流桂州戊子特進太常

卿江夏王道宗配流桂州恪母弟蜀王愔廢爲庶人己

亥絳州刺史徐王元禮加授司徒開府儀同三司英國

公勣爲司空三月壬子朔頒孔穎達五經正義於天下  
每年明經令依此考試丙辰上御觀德殿陳逆人房遺  
愛等口馬資財爲五塚引王公諸親蕃客及文武九品  
己上射夏四月戊子林邑國王遣使來朝貢馴象壬寅  
以旱避正殿減膳親錄繫囚遣使分省天下冤獄詔文  
武官極言得失八月己亥隕石十八于同州之馮翊有  
聲如雷九月壬寅尚書右僕射北平縣公張行成薨甲  
戌吏部尚書河南郡公褚遂良爲尚書右僕射依舊知

政事冬十月庚子幸新豐之溫湯甲辰曲赦新豐乙巳  
至自溫湯戊申睦州女子陳碩貞舉兵反自稱文佳皇  
帝攻陷睦州屬縣婺州刺史崔義立揚州都督府長史  
房仁裕各率衆討平之十一月癸丑兵部尚書固安縣  
公崔敦禮爲侍中頒新律疏於天下十二月庚子侍中  
兼太子少保齊縣公高季輔卒

五年春三月戊午幸萬年宮辛未曲赦所經州縣繫囚  
以工部尚書閻立德領丁夫四萬築長安羅郭夏四月

守黃門侍郎潁川縣公韓瑗守尚書侍郎來濟並加銀  
青光祿大夫依舊同中書門下三品閏五月丁丑夜大  
雨水漲暴溢漂溺麟遊縣居人及當番衛士死者三千  
餘人六月恒州大雨滹沱河泛溢溺五千餘家癸丑蒲  
州汾陰縣暴雨漂溺居人浸壞廬舍癸亥中書令柳奭  
兼吏部尚書丙寅河北諸州大水七月辛巳有小鳥如  
雀生大鳥如鳩於萬年宮皇帝舊宅八月大理奏決死  
囚總管七十餘人辛亥詔自今已後五品已上有薨亡

者隨身魚並不須追收辛未吐蕃使人獻馬百匹及大  
驢可高五丈廣袤各二十七步九月丁酉至自萬年宮  
冬十一月癸酉築京師羅郭和雇京兆百姓四萬一千  
人板築三十日而罷九門各施觀十二月癸丑倭國獻  
琥珀碼碯琥珀大如斗碼碯大如五斗器戊午發京師  
謁昭陵在路生皇子賢己未勅二年一定戶

六年春正月壬申朔親謁昭陵曲赦醴泉縣民放今年  
租賦陵所宿衛將軍郎將進爵一等陵令丞加階賜物

甲戌至自昭陵於陵側建佛寺庚寅封皇子弘爲代王  
賢爲潞王二月乙巳皇太子忠加元服内外文武職事  
五品已上爲父後者賜勲一級大酺三日三月營州都  
督程名振破高麗於貴端水嘉州辛道讓妻一產四男  
壬戌昭儀武氏著内訓一篇夏五月癸未命左屯衛大  
將軍盧國公程知節等五將軍帥師出葱山道以討賀  
魯黃門侍郎潁川郡公韓瑗爲侍中中書侍郎南陽男  
來濟爲中書令兼吏部尚書河東縣男柳奭貶遂州刺

史六月大食國遣使朝貢秋七月乙亥侍中固安縣公  
崔敦禮為中書令乙酉均天下州縣公廨八月尚藥奉  
御蔣孝璋員外特置仍同正員外同正自蔣孝璋始也  
己酉大理更置少卿一員先是大雨道路不通京師米  
價暴貴出倉粟糶之京師東西二市置常平倉九月庚  
午尚書右僕射河南郡公褚遂良以諫立武昭儀貶授  
潭州都督乙酉洛州大水毀天津橋冬十月己酉廢皇  
后王氏為庶人立昭儀武氏為皇后大赦天下十一月



丁卯朔臨軒命司空勣左僕射志寧冊皇后文武羣官  
及番夷之長奉朝皇后於肅義門十一月己巳皇后見  
于廟癸酉追贈后父故工部尚書應國公贈并州都督  
武士彠為司空丙子淄州高苑縣吳文威妻魏氏一產  
四男三見育癸巳應國夫人楊氏改封代國夫人十二  
月遣禮部尚書高陽縣男許敬宗每日待詔於武德殿  
西門

七年春正月辛未廢皇太子忠為梁王立代王弘為皇

太子壬申大赦改元為顯慶文武九品已上及五品已下子爲父後者賜勲官一轉大酺三日甲子尚書左僕射兼太子少師燕國公于志寧兼太子太傅侍中韓瑗中書令來濟禮部尚書許敬宗並爲太子賓客始有賓客也御玄武門餞葱山道大總管程知節二月庚寅名破陣樂爲神功破陣樂辛亥贈司空武士彠爲司徒周國公三月辛巳皇后祀先蠶于北郊丙戌戶部侍郎杜正倫爲守黃門侍郎同中書門下三品夏四月戊申御

安福門觀僧玄奘迎御製并書慈恩寺碑文導從以天  
竺法儀其徒甚盛五月己卯太尉長孫無忌進史官所  
撰梁陳周齊隋五代史志三十卷弘文館學士許敬宗  
進所撰東殿新書二百卷上自製序六月岐州刺史潞  
王賢爲雍州牧秋七月癸未中書令魚檢校太子詹事  
固安縣公崔敦禮爲太子少師同中書門下三品改戶  
部尚書爲度支尚書侍郎亦然八月丙申太子少師崔  
敦禮卒左衛大將軍程知節與賀魯所部歌邏祿獲刺

頡頏及處月預支俟斤等戰於榆幕谷大破之斬首千  
餘級獲駝馬牛羊萬計九月癸酉初詔戶滿三萬已上  
為上州二萬已上為中州先為上州中州者各依舊皇  
后製外戚誠庚辰括州海水泛溢壞安固永嘉二縣損  
四千餘家辛巳初制都督及上州各置執刀十五人中  
州下州十人癸未初置驃騎大將軍官為從一品程知  
節與賀魯男啞運戰斬首數千級進至恒篤城俘其部  
落戶口及貨物鉅積冬十一月乙丑皇子顯生詔宗官

朝集使各加勲級十二月乙酉置算學左屯衛大將軍程知節坐討賀魯逗留追賊不及減死免官罷蘭州都督鄯州置都督

二年春正月庚寅幸洛陽命右屯衛將軍蘇定方等四將軍為伊麗道將軍帥師以討賀魯二月辛酉入洛陽宮曲赦洛州庚午封皇第七子顯為周王徙封許王素節為郇王三月甲子中書侍郎李義府為中書令魚檢校御史大夫黃門侍郎杜正倫兼度支尚書依舊同中

書門下三品夏五月丙申幸明德宮秋七月丁亥還洛陽宮八月丁卯侍中潁川縣公韓瑗左授振州刺史中書令兼太子詹事南陽侯來濟左授台州刺史皆坐諫立武昭儀為皇后救褚遂良之貶也禮部尚書高陽郡公許敬宗為侍中以立武后之功也九月庚寅度支尚書杜正倫為中書令冬十月戊戌親講武於許鄭之郊曲赦鄭州遣使祭鄭大夫國僑漢太丘長陳寔墓十二月乙卯還洛陽宮庚午改昏葉宮丁卯手詔改洛陽宮

為東都洛州官員階品並准雍州廢穀州以福昌等四  
縣并懷州河陽濟源溫鄭州汜水並隸洛州己巳中書  
省置起居舍人兩員品同起居郎庚午以周王顯為洛  
州牧壬午分散騎常侍為左右各兩員其右散騎常侍  
隸中書省

三年春正月戊子太尉趙國公無忌等脩新禮成凡一  
百三十卷二百五十九篇詔頒於天下二月丁巳車駕  
還京壬午親錄囚徒多所原有蘇定方攻破西突厥沙

鉢羅可汗賀魯及咥運闕吸賀魯走石國副將蕭嗣業

追擒之收其人畜前後四十餘萬甲寅西域平以其地

置濠池崑陵二都督府復於龜茲國置安西都護府以

高昌故地為西州置懷化大將軍正三品歸化將軍從

三品以授初附首領仍分隸諸衛六月程名振攻高麗

九月廢書算律學有司奏請造排車七百乘擬行幸載

排城上以為勞民乃於舊頓置院墻焉冬十一月乙酉

兼中書令皇太子賓客兼檢校御史大夫河間郡公李



義府左授普州刺史兼中書令皇太子賓客襄陽郡公  
杜正倫左授橫州刺史中書侍郎李友益除名配流雋  
州戊戌侍中許敬宗權檢校中書令戊子侍中皇太子  
賓客權檢校中書令高陽縣公許敬宗為中書令賓客  
已下如故大理卿辛茂將為侍中鴻臚卿蕭嗣業於石  
國取賀魯至獻於昭陵甲辰開府儀同三司鄂國公尉  
遲敬德薨

四年春二月乙亥上親策試舉人凡九百人惟郭侍封

張九齡五人居上第令待詔弘文館隨仗供奉三月以  
左驍衛大將軍郾國公契苾何力往遼東經略夏四月  
己未太子太傅尚書左僕射燕國公于志寧為太子太  
師仍同中書門下三品乙丑黃門侍郎許圜師同中書  
門下三品丙戌太子太師同中書門下三品燕國公于  
志寧免官放還私第戊戌太尉揚州都督趙國公無忌  
帶揚州都督於黔州安置依舊準一品供給五月丙申  
兵部尚書任雅相度支尚書盧承慶並叅知政事秋七

月壬子普州刺史李義府為吏部尚書同中書門下三品冬十月乙巳皇太子加元服大赦天下文武五品已上子孫為父祖後者加勳官一級大酺三日閏十月戊戌幸東都皇太子監國戊戌至東都十一月以中書侍郎許圜師為散騎常侍檢校侍中戊午兼侍中辛茂將卒癸亥以邢國公蘇定方為神丘道總管劉伯英為崑夷道總管

五年春正月甲子幸并州二月辛巳至并州丙戌宴從

官及諸親并州官屬父老賜帛有差曲赦并州及管內  
諸州義旗初職事五品已上身亡歿墳墓在并州者令  
所司致祭佐命功臣子孫及大將軍府僚佐已下令見  
存者賜階級有差量才處分起義之徒職事一品已下  
賜物有差年八十已上版授刺史縣令佐命功臣食別  
封身已歿者為後子孫各加兩階賜酺三日甲午祠舊  
宅以武士護殷開山劉政會配食三月丙午皇后宴親  
族鄰里故舊於朝堂命婦婦人入會於內殿及皇室諸

親賜帛各有差及從行文武五品以上制以皇后故鄉并州長史司馬各加勲級又皇后親預會每賜物千段菽親五百段大功已下及無服親鄰里故舊有差城內及諸婦女年八十已上各版授郡君仍賜物等已酉講武於并州城西上御飛閣引羣臣臨觀辛亥發神丘道軍伐百濟丁巳左右領始改左右千牛夏四月戊寅車駕還東都造八關宮于東都苑內癸亥至自并州五月壬戌幸八關宮改為合璧宮六月庚午朔日有蝕之

辛卯詔文武五品已上四科舉人甲午駕還東都秋七月乙巳廢梁王忠為庶人徙於黔州戊辰度支尚書同中書門下三品盧承慶以罪免八月庚辰蘇定方等討平百濟面縛其王扶餘義慈國分為五部郡三十七城二百戶七十六萬以其地分置熊津等五都督府曲赦神丘崑夷道總管已下賜天下大酺三日九月戊午賜英國公勣墓塋一所冬十月丙子代國夫人楊氏改榮國夫人品第一位在王公母妻之上十一月戊戌朔邢

國公蘇定方獻百濟王扶餘義慈太子隆等五十八人  
俘於則天門責而宥之乙卯狩於許鄭之郊十二月己  
卯至自許州

六年春正月乙卯於河南河北淮南六十七州募得四  
萬四千六百四十六人往平壤帶方道行營二月乙未  
以益綿等州皆言龍見改元曲赦洛州龍朔元年三月  
丙申朔改元壬戌幸合璧宮夏五月丙申命左驍衛大  
將軍涼國公契苾何力為遼東道大總管左武衛大將

軍邢國公蘇定方爲平壤道大總管兵部尚書同中書

門下三品樂安縣公任雅相爲涇江道大總管以伐高

麗是日皇后請禁天下婦人爲俳優之戲詔從之甲子

晦日有蝕之六月庚寅中書令許敬宗等進累壁六百

三十卷目錄四卷秋七月癸卯車駕還東都八月丙戌

令諸州舉孝行尤著及累葉義居可以勵風俗者九月

甲辰以河南縣大女張年百三歲親幸其第又幸李勣

之第天宮寺是高祖潛龍時舊宅上周歷殿宇感愴久



之度僧二十人皇后至許圜師第壬子徙封潞王賢爲  
沛王是日以雍州牧幽州都督沛王賢爲揚州都督左  
武侯大將軍牧如故以洛州牧周王顯爲并州都督是  
日勅中書門下五品已上諸司表官尚書省侍郎并諸  
親三等已上並詣沛王宅設宴禮奏九部樂禮畢賜帛  
雜綵等各有所差冬十月丁卯狩于陸渾癸酉還宮是歲  
新羅王金春秋卒其子法敏嗣立

二年春正月乙巳太府寺更置少卿一員分兩京檢校

丙午東都初置國子監并加學生等員均分於兩都教  
授二月甲子改京諸司及百官名尚書省爲中臺門下  
省爲東臺中書省爲西臺左右僕射爲左右匡政左右  
丞爲肅機侍中爲左相中書令爲右相自餘名以義訓  
改之又改六宮內職名甲戌司戎太常伯沮江道總管  
樂安縣公任雅相卒於軍三月甲申自東都還京癸丑  
幸同州蘇定方破高麗于葦島又進攻平壤城不克而  
還夏四月庚申朔至自東都辛巳造蓬萊宮成徙居之

五月丙申左侍極許圉師為左相乙巳復置律書算三  
學六月己未朔皇子旭輪生乙丑初令道士女冠僧尼  
等並盡禮致拜其父母乙亥制蓬萊宮諸門殿亭等名  
秋七月丁亥朔以東宮誕育滿月大赦天下賜酺三日  
八月甲午右相許敬宗乞骸骨壬寅許敬宗為太子少  
師同東西臺三品仍知西臺事九月司禮少常伯孫茂  
道奏稱八品九品舊令著青亂紫非卑品所服望令著  
碧詔從之戊寅前吏部尚書河間郡公李義府起復為

司列太常伯同東西臺三品冬十月丁酉幸溫湯皇太子弘監國丁未至自溫湯庚戌西臺侍郎上官儀同東西臺三品十一月辛未左相許圜師下獄癸酉封皇弟四子旭輪為殷王十二月辛丑改魏州為冀州大都督府改冀州為魏州又以并揚荆益四都督府並為大都督府沛王賢為揚州大都督周王顯為并州大都督殷王旭輪遙領冀州大都督左相許圜師解見任

三年春正月左武衛大將軍鄭仁泰等帥師討鐵勒餘

種盡平之乙丑司列太常伯李義府為右相二月丙戌隴雍同岐等一十五州戶口徵修蓬萊宮癸巳置太子左右諭德及桂坊大夫等官員改司經局為桂坊館崇賢館罷隸左春坊丁酉減京官一月俸助修蓬萊宮庚戌詔曰天德施生陽和在節言念幽圉載惻分宵雖復每有哀矜猶恐未免枉濫在京繫囚應流死者每日將二十人過於是親自臨問多所原有不盡者令皇太子錄之詔以書學隸蘭臺實學隸祕閣律學隸詳刑寺改

燕然都護府為瀚海都護府瀚海都護府為雲中都護  
府二月前左相許圜師左遷虔州刺史太子弘撰瑤山  
玉彩成書凡五百卷夏四月乙丑右相李義府下獄戊  
子李義府除名配流嶺州丙午幸蓬萊宮新起含元殿  
秋八月癸卯彗星見於左攝提戊申詔百寮極言正諫  
命司元太常伯竇德立司刑太常伯劉祥道等九人為  
持節大使分行天下仍令内外官五品已上各舉所知  
冬十月丙申絳州麟見于介山丙午含元殿前麟趾見

十一月癸酉雨水十二月庚子詔改來年正月一日為  
麟德元年春正月甲子改雲中都護府為單于大都護  
府官品同大都督府二月丁亥加授殷王旭輪單于大  
都護戊子幸萬年宮三月辛亥展大赦禮丁卯長女追  
封安定公主謚曰思其鹵簿鼓吹及供養所須並如親  
王之制於德業寺遷于崇敬寺夏四月衛州刺史道王  
元慶薨五月許王孝薨乙卯於昆明之弄棟川置姚州  
都督府秋八月丙子朔至自萬年宮便幸舊宅己卯降

萬年縣繫囚因幸太慈恩寺壬午還蓬萊宮戊子兼司  
列太常伯檢校沛王府長史城陽縣侯劉祥道兼右相  
大司憲竇德玄兼司元太常伯檢校左相九月己卯詔  
曰周京兆尹左右宮伯大將軍司衛上將軍少冢宰廣  
陵郡公宇文孝伯忠亮存心貞堅表志淫刑既逞方納  
諫而求仁忍忌將加甘捐軀而徇節年載雖久風烈猶  
生宜峻徽章式旌脣胄其孫左威衛長史思純可加授  
朝散大夫十二月丙戌殺西臺侍郎上官儀戊子庶人



忠坐與儀交通賜死右相城陽縣侯劉祥道為司禮太常伯太子右中護檢校西臺侍郎樂彥瑋西臺侍郎孫處約同知政事是冬無雪

二年春正月壬午幸東都丁酉幸合璧宮戊子慮雍洛二州及諸司囚甲子以發向太山停選三月甲寅兼司戎太常伯永安郡公姜恪同東西臺三品辛未東都造乾元殿成閏月癸酉日有蝕之四月丙午曲赦桂廣黔三都督府管內大辟罪已上丙寅講武邙山之陽御城

北樓觀之戊辰左侍極仍檢校大司成嘉興縣子陸敦  
信為檢校右相其大司成宜停西臺侍郎孫處約樂彥  
璋並停知政事五月辛卯以秘閣郎中李淳風造歷成  
名麟德歷頒之以司空英國公李勣少師高陽郡公許  
敬宗右相嘉興縣子陸敦信左相鉅鹿男竇德立為檢  
校封禪使六月鄜州大水壞城邑秋七月鄧王裕薨冬  
十月戊午皇后請封禪司禮太常伯劉祥道上疏請封  
禪癸亥高麗王高藏遣其子福男來朝丁卯將封泰山

發自東都是歲大稔米斛五錢麴麥不列市十一月丙  
子次于原武以少牢祭漢將紀信墓贈驃騎大將軍庚  
寅華州刺史燕國公于志寧卒十二月丙午御齊州大  
廳乙卯命有司祭泰山丙辰發靈巖頓

舊唐書卷四

舊唐書卷四考證

高宗本紀卷上永徽元年十二月瑤池都督沙鉢羅葉  
護阿史那賀魯以府叛自稱可汗總有西域之地○  
新書在二年正月綱目亦同新書

四年十一月以邢國公蘇定方為神丘道總管○

臣德

潛按新書本紀五年三月大將軍蘇定方為神丘道

大總管以伐百濟也定方本傳顯慶五年拜熊津道  
大總管考熊津在朝鮮城南唐置熊津都督府于其

地定方以神丘道魚領之兩書正相合也且其時定  
方方討都曼何以又有神丘道之命乎疑屬下五年  
之文錯簡于此

五年六月駕還東都○

臣德潛

按前夏四月已書駕還

東都矣以後未嘗巡幸何又書還東都耶應即前至  
自并州文重見于此

龍朔二年秋七月丁亥朔以東宮誕育滿月大赦天下  
○沈炳震曰此時太子弘為東宮皇子旭輪非東宮

也當從新書書子旭輪生滿月大赦為合

舊唐書卷四考證

謹案卷三第十二頁後八行野蚕食柎葉刊本葉訛菜今改

第二十三頁前八行巳卯蒐于華原刊本巳訛乙案是日乙亥後四日得巳卯又新書太宗紀作巳卯今據改

卷四第二十一頁前三行同東西臺三品刊本三訛二據上文改

第二十二頁前四行配流雋州刊本雋訛雋今改







總校官庶吉士臣侍朝

校對官中書臣張塤

膳錄舉人臣汪志伊

膳錄貢生臣黃永澄